

54.

Član 3.

Na osnovu poglavlja V, odjeljka B. člana 45. a/ Ustava Hercegovačko-neretvanskog kantona ("Službene novine Hercegovačko-neretvanskog kantona", broj: 2/98), **d o n o s i m**

U K A Z
o proglašenju Zakona o
javnom okupljanju

Proglašava se Zakon o javnom okupljanju kojeg je donijela Skupština Hercegovačko-neretvanskog kantona na XI sjednici održanoj 27. juna 2000. godine.

Broj: 01 - I - 071 / 00
Mostar, 27. juna 2000. godine

GUVERNER
Rade Bošnjak, s.r.

Z A K O N
O JAVNOM OKUPLJANJU

Član 1.

Gradani imaju pravo na mirno okupljanje i javni protest (u daljem tekstu: javno okupljanje) pod uslovima propisanim Zakonom o javnom okupljanju (u daljem tekstu: Zakon).

Član 2.

Javna okupljanja građana u smislu ovog Zakona smatraju se okupljanja na otvorenom ili zatvorenom prostoru organizovana radi ostvarivanja zabavnih, kulturnih, vjerskih, humanitarnih, socijalnih, sportskih ili drugih interesa građana te protesti, obilasci, povorke i druga slična javna okupljanja organizovana u svrhu javnog izražavanja misli ili ostvarivanja političkih interesa građana.

Vjerske zajednice ne mogu organizovati političke skupove.

Javno okupljanje mora se prijaviti, a prijava mora stići nadležnoj policijskoj upravi (u daljem tekstu: policijska uprava), najkasnije 72 sata prije početka njegovog održavanja.

Ne prijavljuju se slijedeća javna okupljanja:

- 1) vjerski obredi koji se održavaju u prostorijama ili prostoru koji služi u vjerske svrhe i vjerski obredi koji se na zahtjev vjernika obavljaju u vezi sa porodičnim ili drugim sličnim vjerskim obredima i običajima;
- 2) uobičajene narodne svečanosti;
- 3) uobičajene pogrebne povorke;
- 4) uobičajeni sastanci i seminari i druga slična okupljanja koja se održavaju u zatvorenom prostoru i na kojima pristup nije svakome dopušten;
- 5) okupljanja koja se održavaju u prostorijama koje nisu otvorene za javnost ako se na njima razmatraju pitanja sindikalnog organizovanja, odnosno pitanja zaštite privrednih i socijalnih interesa članova sindikalnih organizacija;
- 6) uobičajena okupljanja kulturno-zabavnog i sportskog karaktera koje organizator u okviru svoje redovne djelatnosti priređuje u zatvorenim prostorima koji su namijenjeni u te svrhe;
- 7) uobičajeni sastanci i okrugli stolovi registrovanih političkih stranaka i udruženja građana, koji se održavaju u zatvorenom prostoru.

Organi lokalne samouprave mogu odrediti mjesto na kome se svako javno okupljanje može održati.

Član 4.

Održavanje javnog okupljanja prijavljuje organizator.

Prijava iz stava 1. ovog člana podnosi se policijskoj upravi prema mjestu na kome se javno okupljanje namjerava održati.

Ako se okupljanje održava van sjedišta policijske uprave iz stava 2. ovog člana prijava se

podnosi policijskoj upravi prema mjestu na kome se javno okupljanje namjerava održati. Policijska uprava koja je primila prijavu a nije nadležna za njeno rješavanje, bez odlaganja će prijavu dostaviti nadležnoj policijskoj upravi, o čemu će obavijestiti podnosioca prijave.

Prijava za održavanje javnog okupljanja sadrži:

- a) Podatke o organizatoru javnog okupljanja: naziv i sjedište pravnog lica organizatora javnog okupljanja, ime i prezime JMBG odgovornog lica u pravnom licu ili ime i prezime, JMBG, podatke o rođenju i prebivalištu fizičkog lica organizatora javnog okupljanja;
- b) Podatke o javnom okupljanju:
 - svrhu javnog okupljanja;
 - mjesto, dan i vrijeme održavanja javnog okupljanja;
 - broj učesnika koji se očekuju na javnom okupljanju;
 - sredstva koja će nositi ili upotrebljavati učesnici javnog okupljanja (transparenti, zastave, maske, pirotehnička sredstva, vozila, muzički instrumenti, zvana i dr.);
- c) Mjere obezbjeđenja
 - ime i prezime, JMBG, podatke o rođenju i prebivalištu odgovornog lica-rukovodioca javnog okupljanja (u daljem tekstu: rukovodilac).
 - broj redara, njihovi lični podaci, kao i podaci o opremi kojom raspolažu;
 - podaci o angažovanju drugih službi na javnom okupljanju (vatrogasna vozila, vozila hitne medicinske pomoći, kamermani, fotografi i dr.)

U slučaju kada se javno okupljanje održava na javnim saobraćajnim površinama, organizator je dužan uz prijavu priložiti i odobrenje predviđeno propisima o bezbjednosti saobraćaja na putevima.

Član 5.

Policijska uprava izdaje rješenje o odobrenju održavanja javnog okupljanja, nakon što utvrdi da su ispunjeni uslovi propisani ovim Zakonom.

Policijska uprava može rješenjem zabraniti prijavljeno javno okupljanje na određenom mjestu, u određeni dan ili vrijeme ako bi javnim okupljanjem bio ugrožen javni red i mir.

Rješenje iz stava 1. i 2. ovog člana policijska uprava obavezna je donijeti u roku od 48 sati od prijema prijave.

Žalba na rješenje iz stava 1. i 2. ovog člana ne odlaže izvršenje rješenja.

Organizator javnog okupljanja po prijemu rješenja o zabrani istog, obavezan je odmah obavijestiti javnost o zabrani javnog okupljanja i ukloniti istaknuta obavještenja o održavanju javnog skupa.

Član 6.

Organizator javnog okupljanja određuje rukovodioca javnog okupljanja.

Rukovodilac ustrojava redarsku službu i određuje redare koji su dužni održavati red i mir, a prije početka održavanja javnog okupljanja dostavlja policijskoj upravi podatke o načinu na koji je ustrojena redarska služba.

Ako mjere obezbjeđenja koje je utvrdio rukovodilac nisu primjerene, policijska uprava naložit će rukovodiocu dodatne mjere obezbjeđenja ili zabraniti javno okupljanje.

Ako mjere obezbjeđenja koje je utvrdio rukovodilac nisu primjerene, a javno okupljanje je od posebnog značaja ili interesa za Hercegovačko-neretvanski kanton (u daljem tekstu: Kanton) ili jedinicu lokalne samouprave na čijem se području predviđa održavanje javnog okupljanja, policijska uprava može, u skladu sa svojim ovlaštenjima, dodatno obezbjediti javno okupljanje ili preduzeti kompletne mjere obezbjeđenja istog.

Član 7.

Redar mora biti punoljetna osoba, i za vrijeme trajanja javnog okupljanja mora imati na rukavu vidljivu oznaku s natpisom: "redar".

Redar ne smije nositi oružje ni uniformu za vrijeme obavljanja dužnosti obezbjeđenja

javnog okupljanja, u smislu člana 15. ovog Zakona.

Ako redarsku službu obavljaju radnici preduzeća za pružanje zaštitarskih usluga, isti mogu nositi propisana sredstva lične zaštite i sredstva za međusobnu komunikaciju kao i propisanu uniformu preduzeća.

Član 8.

Organizator i rukovodilac su odgovorni za ustroj redarske službe, održavanje reda i mira na javnom okupljanju, te vođenje javnog okupljanja.

Član 9.

Rukovodilac je dužan preduzeti radnje radi isključivanja lica koja tokom javnog okupljanja remete javni red i mir.

Rukovodilac je dužan prekinuti javno okupljanje ako ocjeni da će javno okupljanje poprimiti nasilnički tok kojim se ugrožava bezbjednost ljudi i imovine.

Rukovodilac može uz saglasnost ovlaštenog službenog lica policijske uprave odlučiti da se prekinuto javno okupljanje nastavi nakon što je uspostavljen javni red i mir.

Član 10.

Ovlašteno službeno lice policijske uprave narediti će rukovodiocu da prekine javno okupljanje, i pozove učesnike da se mirno razidu, ako za vrijeme trajanja javnog okupljanja nastupe razlozi zbog kojih se javno okupljanje može zabraniti.

Ako rukovodilac ne postupi po naredbi iz stava 1. ovog člana ovlašteno službeno lice policijske uprave prekinut će javno okupljanje.

Član 11.

Policijska uprava će prekinuti javno okupljanje i zatražiti od učesnika da se razidu ako

javno okupljanje nije prijavljeno ili se održava protivno prijavi.

Član 12.

Strano fizičko ili pravno lice može organizovati javno okupljanje samo po predhodnom odobrenju.

Zahtjev za izdavanje odobrenja za održavanje javnog okupljanja organizator iz stava 1. ovog člana dužan je podnijeti policijskoj upravi najkasnije 5 dana prije početka održavanja javnog okupljanja.

Zahtjev iz stava 2. ovog člana može se odbiti iz razloga iz kojih se javno okupljanje može zabraniti.

Član 13.

Javno okupljanje ne može organizovati, voditi i na njemu istupati lice prema kome je izrečena mjera bezbjednosti, odnosno zabrana javnog istupanja za vrijeme dok ta mjera traje.

Javna okupljanja ne mogu organizovati političke organizaciji ili udruženja građana čiji je rad zabranjen.

Član 14.

Zabranjeno je učesnicima javnih okupljanja i licima koja se kreću prema mjestu održavanja javnog okupljanja, nositi oružje ili predmete namijenjene ili podobne za nanošenje ozljeda ili oštećivanje imovine.

Član 15.

Zabranjeno je na javnim okupljanjima nositi oznake ili druge simbole čime se podstiče nasilje, nacionalna ili vjerska mržnja.

Član 16.

Održavanje javnog okupljanja zabranit će se:

- 1) Ako javno okupljanje organizuje lice kome je izrečena mjera bezbjednosti odnosno

- zabrana javnog istupanja za vrijeme dok ta mjera traje,
- 2) Ako javno okupljanje organizuje politička organizacija ili udruženje građana čiji je rad zabranjen,
 - 3) Ako su utvrđene okolnosti iz kojih proizilazi da će se na javnom okupljanju ugrožavati ustavni poredak, činiti kažnjiva djela, narušavati javni red i mir ili vrijeđati javni moral, te da će biti ugrožena bezbjednost ljudi i imovine,
 - 4) Na zahtjev Ministarstva zdravstva radi zaštite zdravlja građanstva.

Član 17.

Novčanom kaznom od 100 KM do 500 KM, ili kaznom zatvora do 60 dana kaznit će se za prekršaj:

1. Organizator koji organizuje javno okupljanje bez prethodne prijave kada je prijavljivanje javnog okupljanja obavezno (član 3. stav 1),
2. Organizator koji postupi suprotno rješenju policijske uprave iz člana 5. ovog Zakona,
3. Organizator i rukovodilac koji nisu preduzeli Zakonom propisane mjere obezbjeđenja (član 6.),
4. Organizator, odnosno rukovodilac koji dopusti da javno okupljanje poprimi nasilnički tok (član 9. stav 2.),
5. Rukovodilac koji ne prekine javno okupljanje ako su nastupili razlozi iz člana 10. ovog Zakona,
6. Organizator koji održi javno okupljanje suprotno prijavi o održavanju (član 11),
7. Lice kome je izrečena mjera bezbjednosti, odnosno zabrana javnog istupanja, a koje organizuje ili istupa na javnom okupljanju za vrijeme dok ta mjera traje, (član 13. stav 1.)
8. Rukovodilac koji dopusti da učesnici na javnom okupljanju nose oružje ili predmete namijenjene ili podobne za nanošenje ozljeda ili oštećivanje imovine (član 14.)
9. Organizator koji uprkos zabrani održavanja javnog okupljanja održi javno okupljanje (član 16.).

Pravno lice za prekršaje iz tačke 1, 2, 3, 4, 6. i 9. kaznit će se novčanom kaznom od 300 do 5000 KM, a u posebno teškom slučaju do 10 000 KM, a odgovorno lice u pravnom licu novčanom kaznom od 300 do 1000 KM, a u posebno teškom slučaju do 2000 KM.

Novčanom kaznom od 2000 KM, kaznit će se za prekršaj i pravno lice koje organizuje javno okupljanje, a djelovanje mu je zabranjeno odlukom nadležnog suda.

Novčanom kaznom od 500 KM, kaznit će se za prekršaj i odgovorno lice u pravnom licu iz stava 3. ovog člana.

Novčanom kaznom od 2000 KM kaznit će se za prekršaj vjerska zajednica ako organizuje politički skup a odgovorno lice u istoj novčanom kaznom od 500 KM ili kaznom zatvora do 60 dana (član. 2. stav 2.)

Član 18.

Novčanom kaznom od 20 KM do 100 KM kaznit će se za prekršaj:

1. Redar koji za vrijeme održavanja javnog okupljanja nosi oružje ili uniformu (član 7. stav 2),
2. Lice koje je isključeno s javnog okupljanja a ne napusti mjesto javnog okupljanja (član 9. stav 1.),
3. Ko na javnom okupljanju ili na putu prema mjestu održavanja javnog okupljanja nosi oružje ili predmete namijenjene ili podobne za nanošenje ozljeda ili oštećivanje imovine (član 14.),
4. Ko na javnom okupljanju nosi oznake ili druge simbole, čime se podstiče nasilje, nacionalna ili vjerska mržnja (član 15),

Član 19.

Za prekršaje iz člana 7. stav 2., člana 14. i 15. ovog Zakona može se uz novčanu kaznu izreći i zaštitna mjera oduzimanja predmeta.

Član 20.

Za prekršaje navedene u članu 17. i 18. ovog Zakona uz novčanu kaznu ili kaznu zatvora može se izreći i zaštitna mjera udaljenja s područja općine na kojem je prekršaj počinjen, u

trajanju od 30 dana do 6 mjeseci, a za prekršaj iz člana 12. ovog Zakona prema stranom državljaninu može se izreći zaštitna mjera udaljenja stranca sa područja Kantona, u trajanju od 6 mjeseci do tri godine.

Zaštitna mjera udaljenja s područja općine provodi se udaljenjem na području općine gdje lice ima prebivalište. Troškove udaljenja snosi prekršilac.

Niko ne može biti udaljen s područja općine na kojoj ima prebivalište.

U rješenju o prekršaju odredit će se rok u kojem je okrivljeni dužan napustiti područje općine na kojem je učinio prekršaj, a koji ne može biti kraći od 12 sati niti duži od tri dana. Žalba protiv rješenja ne odgađa izvršenje ove zaštitne mjere.

Ko se u roku iz stava 4. ovog člana ne udalji ili ko se za vrijeme trajanja zaštitne mjere udaljenja bez opravdanog razloga vrati na područje sa koga je udaljen kaznit će se za prekršaj novčanom kaznom od 50 do 150 KM ili kaznom zatvora do 5 dana.

Član 21.

Danom stupanja na snagu ovog Zakona, na području Kantona prestat će se primjenjivati zakoni koji su regulisali ovu oblast rada.

Član 22.

Ovaj Zakon stupa na snagu osmog dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA

Broj: 02 - 01 - XI - 089/00
Mostar, 27. juna 2000. godine

PREDSJEDNIK
Omer Macić, dipl. ecc. s.r.

55.

U skladu sa Odlukom Visokog predstavnika od 6. jula 1999. godine u vezi sa prijelaznim periodom tokom kojeg će se osnovati dva općinska suda za područje 6 mostarskih gradskih općina, ovime donosim

ODLUKU

Sudovi će nositi nazive kako slijedi:

- Općinski sud I Mostar (rimskim brojevima) za područje gradskih općina Mostar-Zapad, Mostar-Jugozapad i Mostar-Jug.
- Općinski sud II Mostar (rimskim brojevima) za područje gradskih općina Mostar-Sjever, Mostar-Stari grad i Mostar-Jugoistok.

Nazivi će ostati na snazi tokom prijelaznog perioda koji je odredio Visoki predstavnik.

27. juni 2000. godine

Ured Visokog predstavnika
Regionalni ured Jug-Mostar
Zamjenik Visokog predstavnika
sudija Finn Lynghjem
Mostar

56.

Na osnovu člana 39. Ustava Hercegovačko-neretvanskog kantona ("Službene novine Hercegovačko-neretvanskog kantona", broj 2/98, i člana 20. Privremenog poslovnika o radu Skupštine Hercegovačko-neretvanskog kantona ("Službene novine Hercegovačko-neretvanskog kantona", broj 1/98), Skupština Kantona na sjednici održanoj dana 27. juna 2000. godine, donijela je

ODLUKU o usvajanju Programa rada Vlade Hercegovačko-neretvanskog kantona za 2000. godinu

Član 1.

Usvaja se Program rada Vlade Hercegovačko-neretvanskog kantona za 2000. godinu.